

四庫全書

集部

# 欽定四庫全書

集部

彭城集卷十三

十六

詳校官庶吉士臣馬履泰

檢討臣何思鈞覆勘

總校官進士臣程嘉謨

校對官編修臣朱紱

謄錄監生臣鍾拔元

欽定四庫全書

彭城集卷十三

宋 劉攽 撰

七言律詩

次韻和梁郎中詠太一碑

原註御篆額呂舍人撰文孫奭學書

翠琰盤螭近玉題  
芝書光彩貴雄辭  
方從薄忌真如在  
事絕鴻都豈易窺  
幼婦色絲輝錦組  
銀鈎金錯照琉璃  
暮年無望青藜燭  
時就祠官效祝釐

次韻和郭固太保留別長句

關西兵馬盛車鄰君向吳門望緹羣聚米山川都掌內  
折膠天氣及秋分大將軍令窮青海三受降城起拂雲  
壯士不甘文學老應須一劍取功勲

年三十三

年光過眼日復日世事無成三十三尚子幾時當畢嫁  
倉公殊恨不生男老知尚白書無益貧作歸田計不堪  
傳劍由來笑逢掖簿書何必減清談

晨起汴上口占寄韓玉汝

戍鼓鄰雞催啟關  
繁星未墜重愁顏  
雲含雪意朝寒外  
河帶冰光曙色間  
去遠不堪登灞渚  
言歸時復念東山  
梁臺客在文章盛  
修竹何當復共攀

謝霍丘靜樂亭

河陽種花春已滋  
彭澤釀酒醉無期  
宣城家聲故未泯  
單父絃歌方爾為  
會知丘壑潛高興  
新作池塘出夢思  
多慙嵇呂相思意  
空寄羊何共和詩

海陵

楚江葭葦帶青楓  
小市魚鹽一水通  
度日冥茫吹凍雨  
欲晴撩亂起涼風  
秋花舞蝶蒼烟裏  
古木啼鴉返照中  
扶杖堦除搔白首  
可憐卑濕負衰翁

寄陳和叔內翰

六十衰遲祇自寬  
讀書無味細書難  
一麾已愧腰銀印  
百選何由及治官  
潮過石城如雪白  
山從鍾嶺似虬蟠  
元龍豪氣踰堅壯  
投牽能同客醉歡

寄楊元素內翰

四世清名悉上公  
看君羽翮勢陵空  
戲成爐鼎誇方士  
妙奪蒼龜執鬼中  
家有秦聲居自樂  
書非尚白智無窮  
華光講罷承明直  
墨客無煩賦射熊

同諸公晚游開寶寺福聖院

微雨吹涼晚更清  
老人牽強逐君行  
縱談灰燼疑燒劫  
指顧樓臺似化城  
盤屈庭槐為狡獪  
扶持山薜喜縱橫  
偷閒光景易侵夜  
十二街頭坊鼓鳴

奉詔再任諸掾曹有詩因次其韻

衆題再任下  
疑有脫字

天下英雄將相才自銘  
重石畫雲臺老夫不薄淮陽守  
明詔幸緣黃霸來豈有豹文容  
霧隱更慙鵬翼待風培  
諸卿相與望此府詩筆縱橫武庫開

感事

誤以雄名薦九重  
天書待詔未央宮  
白衣不召崔亭伯  
賦筆猶殘亡是公  
魂驚晚出芙蓉輦  
淚墮春生楊柳風  
衰鬢邇來元自白  
可堪回首望遺弓



建業華藏院此君亭

原註王介甫先有此  
君亭詩予因繼後

何可幽棲無此君  
層軒高下絕囂塵  
金聲玉色三千士  
雪戟虵矛丈六身  
定有霜飈驚長夏  
兼疑寒谷近比鄰  
阿戎風味真難得  
好事由來我輩人

答張屯田朝退過閣下諸公

紫宸歸路接銀臺  
複閣重門相望開  
浮俗共譏惟寂寞  
高賢獨肯少裴回  
照人珠玉驚塵骨  
落筆瓊瑤寫逸才  
白日自嫌天上樂  
不應滄海隔蓬萊

衰羸

衰羸因底病相和留滯俄然去日多却是天憐今壽考  
任從人會作風波寬心總與歡欣受迷意無妨慷慨歌  
更有南華書數紙鵬聲蝸角奈渠何

途次馬上晨起寄章運判

去年候客燕趙魏今歲迷職青兗徐無窮道路不相捨  
將老光陰仍暗除官燭鄰雞常曉色林花巢燕總春餘  
未知前古才士意為底願乘萬乘車

傷梅聖俞直講都官

論兵自負縱橫畧獻賦端從遲暮年  
筐篋成書莫知數田園生計獨無錢  
郎官列宿為時貴博士三科不待遷  
已向九原悲蔓草尚疑吳市有神仙

送劉長官桂府掌機宜

桂林風物舊宜人雪片梅花五嶺春  
心喜大江流瘴霧眼看南極異星辰  
軍中羽檄時無警徼外明珠日獻珍  
酒量問君能幾許越猿蠻鳥易傷神

雨後向景亭

春泥軟熟步成黏  
水外風光一頓添  
境為偶來生喜色  
情緣久住失憎嫌  
黃鸝慣習沙鷗野  
古木竈疎徑草纖  
更向樽中得真趣  
天然柔旨不因甜

酬送吳潛朝奉

衰翁同歲喜相收  
同病同心同白頭  
委吏除官俱逆旅  
瘴烟香草等荒州  
六千里外拋機畧  
二十年來謹校讎  
工拙是非無會處  
下陂紅日若為留

酬送羅朝奉

三年流竄逐卑棲歸奉蓬丘顏向低  
病到釣天都是夢  
老如濛汜已平西  
兩轡更忝魚符寵  
雙鬢誰憐鶴髮齊  
相愧清詩無以報  
回將燕石塞縣黎

老去光陰若電驚  
此身已復愧扶行  
歸田悔不如元亮  
畢娶猶能似尚平  
曩歲薦賢終未效  
太音從古竟希聲  
最憐閭里人相語  
北部威名動帝城

冬至登樓

澤國風光早早催陽生已復似春回不妨野史書雲物  
會伴南公進壽杯塵世光陰俱短日客心冥漠過潛灰  
此心未厭隆中卧亦任東風起蟄雷

送高士敦成都鈐轄

使君出守腰銅虎東第歸來上濯龍四姓禮容均馬鄧  
三刀形勝夢已賓軍中樂事隨談笑徼外威聲待指縱  
壯歲勲名當自致舅家恩澤不成封

留別蘇安上

高閣橫霄梧十尋回廊曲檻畫陰陰期年不就長楊賦  
晚歲空為梁甫吟童稚相親俱白髮風波失所更情深  
滄溟極目雲濤壯相見胸中快病襟

與顧子惇同為秘書少監今年余以病求守汝南  
子惇亦除河東漕作詩紀事亦用送別

蓬萊閣下枕書眠一日除官不後先并土山河多馬地  
汝南秔稻濯龍淵壯心自喜談兵策暮齒長慙守乘田  
別後天中相望處參旗橫注太行邊

郡樓望雪

遶郭蒼山高復重東風朔雪曙雲濃層樓已出紅塵境  
到客寧知羣玉峰萬樹羽儀翔白鷺四原鱗甲動真龍  
玉尊清酒留終夕更看山明霽後松

和通判裴庫部城樓雪後

數刻又移半日閒倚樓朝雪正怡顏委蛇原色蒼龍甲  
宛轉城陰玉帶環曾是茵憑偕出處聊於木鴈得中間  
傷春一振曹風陋不羨淮南大小山



復雪

九江舊瘴冬無雪三峽悲風近有水  
山岳出雲寒處處樓臺倚玉照層層  
不憂鴻鴈飛無力直畏蛟龍病莫興  
凍酒一杯還自勸夜窓飄灑讀書燈

次韻宋職方雪

梵天銀界談非想仙府瑤臺恨隔塵  
何事同雲移絕境不知高譙即良因  
林芳散漫裝珠藥粉面光輝照玉人  
別舉一樽邀老伴迎春送臘祇三旬

次韻裴庫部雪二首

小雨駐雲風借威  
回眸千里玉山輝  
塗人竟比麻衣色  
野老時驚白鴈飛  
梁苑正應延上客  
齊宮遙想闕重闈  
誰云自鄮無譏者  
一曲陽春可見微

似薄凝霜不振威  
端凌愛日奪光輝  
變成鹽浦風沙亂  
卷起濤江海上飛  
西望屯雲瞻魏闕  
正思鳴佩賀端闈  
孤城牢落無來客  
坐待山明見翠微

太一宮奉安後得雪

八通除道接層霄五日同雲映沕寥靈貺那從天馬下  
積陰疑有海神朝潤生塵陌無窮遠甘入原田不待消  
陋巷苦寒方晝卧靜無人迹到瓊瑤

雪中呈通判庫部宋職方

冬雪并今早兩回無風韻膩白皚皚麥根得潤萌芽綠  
瘴氣逢寒霧露開官為勸農知我喜心緣愛客望君來  
城頭甚有登臨境羣玉排峯銀作臺

錢穆甫楊康功使高麗還為中書舍人書此為寄

天子邊人二使星滄波一笑已揚舲大明照海陽烏近  
黑霧迎潮水怪腥北貊左肩輸策略西垣右掖付儀刑  
授詩三百成專對更看黃麻似六經

酬狄奉議

病臥湘濱面嶽山每聽鳴鶴憶蘇仙三苗地闊橫千里  
五嶺泉分會一川門有雀羅甘棄置人今舞袖足迴旋  
梁公孫子丹青似傾蓋歡然秀句傳

酬張伯常朝議

郢人蘭雪有餘風盡在君家七字中  
白髮塵纓深念我  
青郊藜杖不如公鄉心正想千年鶴  
老計終須一畝宮  
不諱求田并問舍景山何必晚為通

酬黃朝議

自無籌略預材難非有文華聚筆端  
涉厯羊腸迷坦坦  
穿聯魚目愧珊珊嶽猿聽久堪頭白  
林實嘗來厭齒酸  
葵藿傾心由物性日邊依約見長安

遽公四十九年非萬事當須向老知  
材者不如愚者樂

前人多作後人資羨君黃髮初傾蓋矜我迷津數贈詩  
聽話朱陵仙府事慨然清嘯一伸眉

酬魏朝議

鷺谷相從列俊英四朝容許濫虛名忍將百老言存沒  
乍喜三人詠合併春入芳菲皆意思酒隨衰朽即心情  
新詩不怪煩先唱猶向君前畏後生

贈黃朝議

黃公八十健精神遠近推為五福身樽酒不曾輕賤士

爐丹時復遇幽人晚夸鄉里拖金紫早見兒孫列搢紳  
一事世儒難學處弟兄歸老樂相親

次韻和孔朝議

自愧專城無到客今晨錫晏喜君同詩言泮水始可與  
酒勝邯鄲長不空但有葵心傾日下待看雲瑞起封中  
高車清興底易盡怪似林間束縵翁

和張給事喜雨

勿驚四野連宵雨盡是諸山觸石雲雷響透空如欲墜

電光劃暗總成紋祝官陳信無虛語梵宇凝香不斷薰  
帝力由來人莫識始知延譽屬夫君

次韻韓康公

行馬門闌與古同客車連軫響隆隆定知醉飽能容士  
常信康寧盡屬公剽得新聲夸耳性傳將佳句愈頭風  
文人桃李多無數珠玉旁邊愧此翁

次韻韓康公二首

疊石疏篁淺藥苗淡雲清雨意寥寥鄴侯僻地規摹別



荀令西濠步武遙繞砌芝蘭歡內集滿蹊桃李慰佳招  
原情獨恨飛鴻遠悵望三秋詠采蕭

清汝泱泱紫邏深綠車紅旆付重臨聖朝不逆原鵠意  
達士俱存塞馬心日赤報衙容晏枕夜闌留宴縱清斟  
鳳池何必全勝此薄暮歸休客萬簪

王史館園

鳴泉傍舍水翻車修竹連雲曲逕斜謝傳東山非獨往  
鄮侯避地此傳家丹椒紅桂隨時實綠芰緋薇觸處花

到客可能忘外事斷年相與玩芳華

過柏林院僧吉長老有古殿吳道子畫維摩居士  
又有斷碑是寶歷年中記義岑禪師住院事

靈光歲久獨歸然峴首遺碑亦未遷會向三生記前佛  
暫從方丈識諸天篆香徐刻黃金印梵宇時開貝葉篇  
門外霜風正搖落庭前翠柏自安禪

館宿有懷平甫

銅壺上水掖門扃岑寂回廊起獨行日下屋山三面赤

月臨天井四方明  
校經燈火初無禁  
汗簡文書不計程  
坐憶故人清夜語  
淡雲飛去隔層城

曲阜宣聖廟夫子手植櫟二首

秀色擎空四十圍  
問年今已倍千斯  
移根信假杓關力  
息蔭寧無煖席時  
文字魯恭經改觀  
履綦鍾意想攀枝  
季孫亦自譽佳樹  
漫負甘棠蔽芾詩

伐樹商丘去被圍  
似於庭檜特勤斯  
禹腰堯顙應遺魄  
柏葉松身異曩時  
恭梓二三千學士  
愛棠四十六孫枝

原註孔氏今  
為四十六世

攝衣下馬低回久更就清風一誦詩

城濠泛舟同畢長官

綠水環城十二里茅茨帶郭百餘家  
侵雲柳影不見日  
過雨荷香全勝花  
幽事圍棋翻局勢  
清歡煮雪試茶芽  
眼前景物自蕭散何必青溪向若邪

次韻酬姚都官時會堂見寄

百里崑岡半草萊  
畫梁危棟一朝開  
清川去水縈回渚  
喬木濃陰映綠苔  
子猷人琴俱不幸  
武侯營壘信奇才

斷鴻牢落情愁絕聞笛那堪賦七哀

遊船

太液滄波北下流依然清淺可勝舟  
浴鳬鳴鶴輝輝日折葦衰荷澹澹秋  
勝境陳前終不厭機心去盡了無愁  
宋生善賦登臨興華髮相從免獨遊

和晁金部感秋

秋來無悶亦無悲世味年華老徧知  
黃葉暮蟬攜杖處斷霞鳴鴈倚樓時  
淮陽汲守容多病水部何郎最解詩

咫尺音書那度歲春風已復柳垂絲

雙檣

雙檣森森高出簷憶昨卜鄰逢吉占清風似主我為客  
冠蓋相向何凝嚴愛棠不能如召伯種柳自覺勝陶潛  
春暉漸永羣芳麗翠影看花一寸添

題王金吾園亭

烏衣里巷接城隅東第名園冠上都家事從前貴公子  
宦游當世執金吾舊蹊桃李春相續滿地芝蘭德不孤

故有鼎彝傳盛烈况聞圖史自為娛

負暄

聞道帝師仍負暄遙知愛景滿維垣鷹揚肯顧跋鳥迹  
龍袞尤憐夸父奔赤舄正宜隨步武白駒那敢離庭軒  
野人皆欲獻天子他日期公助一言

陳通議園亭

聚星休沐事依然社臘安車不計年五福何妨兼第宅  
一壺元自有神仙種來珍木如人立移取名花奪地偏

聞道都城曾問卜始知機石不虛傳

杜介供奉園亭

側逕羣芳經荷鋤小窓明日喜觀書下床便得山居樂  
深巷仍多長者車省事即知長脫灑養生元不待贏餘  
客來一醉聊相向莫問經年甌石儲

酬黃安期推官見寄

郴江清澈照毫毛吹笛平陽舍有蒿鄉信不嫌無過鴈  
宦遊正復長兒曹青楓雨後如人立南極秋來出地高



齊難楚稱何日就釣竿元自欲連鰲

酬黃推官

既將魚目換驪珠富潤囊箱足賈餘顧我能知天下馬  
呼兒藏作篋中書老羞流輩為千諾狂守初心付兩如  
相助飛鳴竟何力祇宜空手講玄虛

予所居本章丞相舊第他日友人楊彥文為余道  
丞相時事因作一篇予楊丞相以郎官始卜此宅  
不出都門二十餘年遂至台衮故末句及之

鄧侯常以儉為師僻地依然草滿蹊却指舊池曾浴鳳  
更攀喬樹憶棲雞清泉惡石皆吾有樽酒囊書得自攜  
誰道為郎多白首已看霖雨出蟠泥

與成太博九同年會飲成四韻

原註博士成黼李之純崔度秘書丞

戴莊著作佐郎張于光祿寺丞高士綸觀察  
推官侯利建司理王該高陵主簿張公岳

江海分龍不計年異方傾蓋意歡然壯夫白首驚相問  
濁水清塵默自憐萬事過前都是夢一杯相屬獨非天  
得朋正復同心士賦詠能忘垂隴篇

游玉仙觀寄王四十

紫府仙真冰雪顏  
丹梯岑寂試來攀  
翠鬟濯玉交團扇  
濃霧噴香闥博山  
不信異人能到此  
正憐春意已歸還  
吹笙化鳥知君事  
猶恨來遊先後間

京北流人

嗟爾流入亦可悲  
白頭老叟抱中兒  
不羞遠作投荒客  
自恨生遲外戶時  
魚失江湖相煦沫  
鳥囚籠檻苦啼饑  
鄉原日日生荆棘  
說似旁人猶涕垂

觀灌園偶書

一叟汲泉搖轆轤老妻分水亦攜鋤青青宿草知春入  
浥浥蒼苔過雨初勞力不應強勉養生何必待羸餘  
白頭當作於陵子身教兒孫種樹書

和宋次道三館曉書

天祿圖書一歲開五雲遲日近蓬萊後生得見靈蘭策  
貴客都傾內外臺不似羽陵殘蠹簡正如金谷聚英材  
論詩老去無情思況是陽春未易陪

送張器判官

平吳舊族仕中朝，湯樂徐馮已寂寥。  
吾子白頭趨幕府，同年黃綬亦雲霄。  
着鞭跨馬須爭道，奮臂呼盧更叱梟。  
顏駟馮唐俱晚遇，不妨青紫老垂腰。

次韻和張舍人北使歸

飲水重見古人心，絕幕仍當暮雪深。  
朝出穹廬隨拜日，夜鳴刁斗候橫參。  
胡兒射鴈爭娛客，羌女聽笳却走林。  
聞說敵情親博望，一言珍重萬黃金。

兩府新第

原註張橫侍郎先作用開字  
韻戲次之是時缺昭文不除

聖世諸公起草萊君恩東第一時開排門畫戟交行馬  
轉肘沙堤接上臺衛國名亭緣伐叛平津虛館為翹材  
猶分長史待天下衰老詎能忘儻來

乙巳早春再遊玉仙觀贈陳道士

十里平郊不值人解鞍依約記前春問年已復驚身老  
遇境猶能發興新泉漲池水舒鴈爪霜團庭檜疊龍鱗  
種桃道士長無恙自愧劉郎病滯身

新廣柏悅堂後軒作七言

南榮曝日足娛客北牖來風亦在予聊以維摩開丈室  
便知陶令愛吾廬神龜大蔡昂頭際澤雉名翬矯翼初  
戲問庭前雙古柏閱人無算我誰如

立春謝賜幡勝口號呈子瞻冲元内翰子開器資  
舍人

立春幡勝紫宸朝正以金璫插右貂便覺陽和生暖律  
俱承慶澤下層霄竒零雪片依樓角容易風威轉柳條

七十無能不歸去強將衰白向顏韶

和前韻

雪寒常怯月邊朝乍起東風拂敝貂銀勝綵幡分節物  
宿雲晨霧凝璇霄君為特達千金璧我是衰遲百尺條  
叩缶烏烏聊快耳寧知報響得咸韶

王正仲林子中聯舟西上過睢陽寄書率爾成詩  
為報

大帆如翼畫江來鼙鼓聲乾虺虺雷浴水登仙惟李郭



兔園延客得鄒枚寄書上有加飧飯傾蓋何時數舉杯  
想到石渠尋舊境秋花著子遍庭槐

呂舍人北使

漢德舟車萬里通赤心持節復平戎空同氣色連窮髮  
當戶君臣聚引弓馬酒禦寒朝伴凍貂裘衝雪盡禁風  
清蒲固有安邊畫可待甘陳傳鄭功

仲馮北使

極北空同戴斗星越疆猶有短長亭漢朝正朔原無外

邊地山河不見經雪擁旃裘綿欲折冰生漣酪酒初醒  
我家四世俱持節送爾皇華却涕零

王仲至使北

朔雪如沙萬里程幽陰戴斗正嚴凝終軍何必功橫草  
沈尹無煩夕飲冰茗粥邇來誇漣酪氈裘仍自愧綿繒  
歲寒拜日穹廬外想見東南瑞氣昇

早春郊外

滿城塵土無窮極出郭風煙頓掃除春淺暗泉流脈脈

日長歸鴈影踈踈強將拙計仍謀野等復勞生愧荷鋤  
安得面山臨水地種花移竹一茅廬

贈楊次公秘丞

莫將陽九歸時數自為乾封致吉祥必若中興待雲漢  
枉教流議及桑羊相望冠蓋交馳傳躬作犧牲屬奉常  
膚寸崇朝看變化吾農從此萬斯箱

酬潘及甫同年秘丞

困學那知三代英定交良愧十年兄斷鴻陳迹悲朝露

喬木孤飛念友生樽酒相逢開口笑風波遠別使人驚  
海邊春色青青柳淚落陽關最後聲

彭城集卷十三

欽定四庫全書

彭城集卷十四

宋 劉攽 撰

七言律詩

省宿

開旦文書整日勞  
漏傳門掩謝諸曹  
小庭待月久不下  
喬木降風空自高  
舊學荒蕪多夢寐  
微官補益抵分毫  
秋來鬢髮看成雪  
不似潘生始二毛

次韻和陳學士八月十六日省宿

疎簾珍簟倚通中  
落燼飄香墮玉蟲  
信宿依然十分月  
黃昏正爾一番風  
流螢暗逐星過水  
驚鵲時翻葉墮空  
詩興不禁頭已白  
醉鄉祇有面微紅

次韻和益州張使者

層城表海勢嵯峨  
車騎雍容樂事多  
八月潮平占候火  
三更日上看濤波  
閒留方士談迂怪  
醉聽齊謳起艷歌  
莫以高材厭留滯  
功名從古喻裘蓑

和陳五祠九宮致齋

帝家三正付惟清  
岑寂容臺最古廳  
長日齋居空旦旦  
幾年華髮欲星星  
霜風洒葉都成赤  
籬菊疏花雜閒青  
多少舊溪招隱興  
暫因釐事遠林坰

題所種梧楸

曲檻層簷與樹宜  
三年初見綠陰垂  
聲隨白雨涼生疾  
影奪朱炎暑到遲  
傍倚轆轤看汲井  
下留閒客坐圍碁  
會須百尺參天直  
白髮空嗟拱把詩

還家

草徑茅廬不遠城歸來松竹已秋聲  
鄙人倦客方招隱弱女非男亦慰情  
薄願自甘隨老圃短才無用至名鄉  
閭里相見成幽熟他日禽魚尚不驚

城上新亭

野芳喬木共回環步到西城五里間  
值有叢祠休足力就為幽境慰心顏  
鷗聲遠水連晴日剝影高臺似淺山  
勝事本來容易集可憐人自不能閒



次韻王介甫金陵懷古四首

虎踞羣山帶繞江為誰為國為誰降  
高臺麋鹿看無數廢沼鳬鷺去自雙  
萬里朝雲隨逝水百年西月過虛窓  
白門酒美東風快笑數英雄盡一缸

樓船西下勢橫江元帥旌旗就約降  
旋報前師覆張悌亟傳單騎馘王雙  
燕焚正自當煙突蟻潰何堪值水窓  
回首三軍歡奏凱萬牛行炙酒千缸

楚貢來遲詭問江漢收羣策士心降  
一言已重黃金百

再見仍蒙白壁雙  
漂客脫身甘馬革  
老儒投筆謝書窓  
豈知三閣酣詩酒  
浩唱庭花倒玉缸

顏垣落水半平江  
喬木風呼不易降  
耕出珠璣時得一  
道逢麟鳳不成雙  
潮聲半夜來寒渚  
月色深秋照舊窓  
唯有魚鹽城下市  
檣烏想望集餅缸

送馮當世移金陵

滿城攜酒駐高軒  
楚老沾衣共一言  
何幸期年無吏事  
方從歎歲識君恩  
潮迎綵鷁來瓜步  
山映朱旗轉白門

早晚使星還北極  
溥看霖雨濟乾坤

李公擇自滑州移知鄂州

黃鶴仙人去不留  
武昌官柳傍層樓  
前山欲近滄浪水  
芳草遙分鸚鵡洲  
漁父嘯歌聊自樂  
禰衡詞賦若為謀  
朱輪皂蓋一身貴  
談笑豈知千古愁

得江同州和詩後却寄

左輔關河二十城  
使車全勝直承明  
白頭樽酒諳風味  
乘興篇章得性情  
首著空肥天驥老  
風霜有意阜鵬橫

驚沙急雪迷秦樹不似山陰一日程

次韻和裴潤州見寄

江城山翠若連環城下波濤暗楚關去計祇應勞侍從  
歸心願復賜清閒百年舊法軒丘外千里傷懷羸博間  
過事惱君堪白首添歡惟有綵衣斑

陸子履知潁州

稻白魚肥潁水清重湖光彩動層城經為遊客歡閭里  
特羨朱軒擁旆旌整棹鳬鷺橫筆勢倚樓風雨壯歌聲

聚星賢士兼存歿配社名鄉見遠情

原註郡人王回常秩近有詔拜官而

深甫歿逝聞常君謀爵不至故詩及之

### 寄韓慶州

萬騎將軍西護羌邊塵無復近  
麾幢烽傳列障來遮敵  
雪擁層城接受降日暮悲笳還自疊  
天寒羈鴈少成雙  
檄書不得從軍樂  
羈弩空令候小邦

### 送謝師厚知唐州

原註先是知唐州以興水田受賞師厚家在鄧州

腰虎憑熊近越鄉  
方城南望色蒼蒼  
社人隨處祠桐柏

傳馬來時認肅爽兩國風煙通置吏百年荆棘勸鋤荒  
王成勞徠先蒙賞史起猶應問濁漳

送王廣淵郎中知潁州

二月潁河春水生檣烏相望使君行東風不起驚濤勢  
遲日何妨短驛程坐有圖書歡傲吏靜看魚鳥忘專城  
漢庭良守誰先賞會見膠東舉相成

送光祿呂卿知懷州

卿秩西來郡組新東京故事本憂民太行形勝連天黨

積石波濤會孟津千里雄風隨坐嘯百城膏雨待行春  
期年定有周堪詔父老無勞借寇恂

送龔鼎臣修撰知兗州

楚國清名世豈知郡章新得泰山歸靜思鵬鷺霜天勢  
却看蓬瀛客旆飛去國鬢毛休變色還家傳瑞已生輝  
翠華早晚東巡守馳道離宮接帝畿

送呂郎中知解州

南風吹雪暑飛霜瞬息高車起重裝胡馬邇來充牧苑

漢兵無處不餘糧部丞丞上司農奏腰組仍夸太守章  
正賴研桑密心計晚從王謝識諸郎

送宋次道知絳州

案前使漢書忘多後人所補  
次道必預修唐書故詩云然

銅鞮宮觀久塵埃樊守園池亦壯哉屬縣老人書亥字  
臨汾神祀問臺駘土風頗記堯遺俗府吏猶疑楚有材  
漢史待君成十志傳車長望北風來

送韓文饒知均州

原註自  
南鄭州

嶺梅陰下駐旌旗五月歸更竹使符漢上川原連夢澤



鄖人風俗語於菟奮髯曹吏知無事坐嘯雲山得自娛  
建禮會朝兼夜直羨君鞦韆盛前驅

寄孫秦州

十年幕府領旌麾事半前人此復稀元帥詩書真用武  
小戎車甲豈無衣敵兵候月麒麟鬪漢馬乘秋苜蓿肥  
自失陰山常慟哭更聞消息向金微

次韻和王秦州

粒食由來不願餘雲飛自愧羽翰孤已同白首滯三署

却羨青郊授一夫出守故人猶虎竹相忘吾道亦江湖  
秋來卧閣知何事鈴索生塵獄有燕

送喬左藏自太常博士除知施州

志士變衣非變性丈夫能勇亦能言東郊不顧田二頃  
愛子歡然弓兩韃黔水犀牛羣解鷓鴣峽山獠子躁欺猿  
蠻溪未足紆長策會使天驕祭北門

送王汝州

讀易絕編經獲麟廷臣推汝老成人宦遊獨怪烏衣晚

吏隱何妨青綬新  
風穴不應長嘯虎  
湯泉寧復為煎薪  
高齋有勝宣城處  
三十六峰為近鄰

九月十日趙令園餞送王汝州汝州留詩二篇次

韻

華髮悲秋復送行  
茂林修竹若為情  
菊花節去香猶在  
桑落寒來色更清  
趙魏優賢常不欲  
春秋知我亦空名  
別離何必皆千里  
分手如今越與荆

五馬來時照路傍  
名園秋物自裳裳  
吹花酒面蟹螯壯

下歧萼絲魚膾長問事不休推景伯讀書未見屬黃香  
窮愁解摘唯須酒身外浮雲天際翔

送韓七文饒郎中再知解州

傳瑞生光廐馬閑使君冠蓋隔年還莫嫌屈產齒加長  
少有甘棠身再攀白徑嶺前開驛路哀烏星裏望朝班  
鹽車過往繁如織驥耳能忘一顧間

送裴郎中知房州

好去臺郎應列星異於遷客向房陵且看銀印懸青綬

可在金輿與玉乘  
柏塢麝臍香不雜  
竹崖牛角價無朋  
清通便是循良術  
三最從君數吏能

寄王濟州

原註濟州書言修  
潔西湖泉石之美

獄市并空俗已和  
使君高興足婆娑  
畫成林色重裝洗  
鑑作湖光更潔磨  
歷下軍聲從古盛  
濟南名士邇來多  
小寒漸有北歸鴈  
話與飛翰同一過

酬王濟州

原註濟州詩言予  
閒暇望鄒岱諸山

郡印拘人祇看山  
簿書無盡且偷閒  
不羞暮景桑榆上

聊寄高情宇宙間  
頗葺池臺增舊觀  
旋栽桃李待堪攀  
老公此意君知否  
未有菟裘未得還

送蒲龍圖知襄州

鳳林關下七連城  
獵獵霜風卷旆旌  
漢陰抱壘防機械  
峴首沈碑認智名  
季孟中間欲誰與  
英賢餘事亦難平  
習池倒載時一往  
却是古今真實情

次韻晁單州詩六首

五字酬君詩百篇  
知音免負伯牙絃  
淹留子賤彈琴地

帳望蘭成射策年術到仙真皆羽化師無前敵在中權  
古今風雅人多少名下聲華不浪傳

材傑知心似合符不違顏氏亦如愚文章偏我不得力  
懷抱與君非有殊龜手但知能澣統緯蕭何意得驪珠  
自攜如意樽前舞曲盡歌長缺酒壺

性僻材疎酷嗜詩頭童齒缺雪垂頤五十已過無聞爾  
三百雖多奚以為每向後生知所畏獨於名士喜同時  
李陵蘇武俱塵土豪傑由來自得師

多愛不忍緣愛奇記人毫髮忘瑕疵垂老此心免愧已  
起予它日亟言詩衣冠為子最青眼兄弟數君仍白眉  
瓠葉豈以菲廢禮鮮首燔炮為宛脾

側逕蜂飛忙蔽日綠陰鶯語靜移時自疑寂寞揚雄宅  
最愛清和謝監詩詞客篇章寫桐葉飲流籌筓折花枝  
相望十舍不相就兩地風光鎮所思

貴公門地多陰德慶事令君大樂生愛子桂枝新上第  
弄孫蘭茁始書名撥弓試復穿楊葉負鼎何妨待鵠羹



不似淮陽多病守十年卧閣見交情

雜諷

陽武舊恩惟丙吉中興同學有嚴遵封侯會自酬陰德  
物色終應訪故人可在介推懷怨望深疑谷犯亦逡巡  
剛腸獨有屠羊說稱義孤高無與鄰

送虞太熙著作知番禺縣

遠師猶覺丹青似大邑知無盤錯憂梅嶺山長因海盡  
夜郎江闊傍城流鯨魚浪作傖人鱸槎客常隨賈舶舟

莫為風帆徑清淺秘書仍自有蓬丘

送曹輔奉議福建轉運判官

馳傳典州名字高溪山更不厭勤勞吏逢照膽新磨鏡  
事似屠牛已善刀頗說團茶如湮酪欲將丹荔比葡萄  
使君詩思過泉湧為賦佳篇悟此曹

陳植文華斗石高景宗詩句復稱豪數奇不得封龍額  
祿仕無妨似馬曹蠹簡傳將蚪蚪字銛鋒瑩出鶚鵠膏  
南州山水能為助更看英詞勝廣騷

送張遂州

原註自開封府判官除

九折無艱蜀道通使君車騎最雍容  
尚書不復拘三輔御史仍開給五封  
接境去思棠樹密退公歡燕綵衣重  
治民固有張京兆坐看巴人益劬農

次韻和張宣德合江亭

此水此山今昔遊蒼煙古木又窮秋  
起隨佳士初乘興忽話離人始欲愁  
南極早知無到鴈北天那可際歸舟  
老身學得灰心也不是灰心淚已流

秋日寄楊十七

簷日輝輝過午天  
棖風槭槭未霜前  
不甘翠葉無時落  
已分黃花特地鮮  
富貴應須三寸舌  
文章不及一囊錢  
詩翁白髮經秋甚  
為問窮愁有幾篇

嶽雲亭

山外浮雲橫翠微  
海邊初日上朝暉  
我無小魯悠悠志  
那欲乘風去去飛  
上客高吟揮玉麈  
佳人半醉舞羅衣  
昏鷗獨鶴何勞問  
合暝投林各有依

檻外連山如合圍  
尤憐昏旦變清暉  
雲行驟雨非無事  
鳥伴歸鴻即倦飛  
厭見市朝車馬迹  
喜看巖谷薜蘿衣  
尚平畢娶何蕭散  
千載高風自可依

薄后廟

駟家冠虎久騰聲  
龍躍中都漢道興  
人事能無輸織室  
母儀終見塋南陵  
蒼苔複閣連荒草  
喬木參雲掛老藤  
欲學靈均紀天問  
古堂丹碧正嚴凝

送鄭秘丞知邛州蒲江縣

明府之官固有程已江繚繞趣君行孤帆去遠滄浪色  
百丈牽遲濫潏聲火井煮鹽收倍利山田種芋勸深耕  
舊來印竹通西域邊吏還知健令名

李尚書除少保致仕

疏公黃髮欲遺名詔秩青宮二品榮自昔為家皆僻地  
更聞題劔得佳城賜金給館君恩重倚杖看山世累輕  
試問門風過萬石白頭賢子已名卿

吳國博未五十致仕歸蘄州

名宦於身甚縉微白頭青紫莫言歸曼容自以微官去  
遽瑗應知過事非笛竹滿山經夏冷江魚如玉向秋肥  
避喧不厭塵紛遠何況孤城人迹稀

與諸公會趙氏園主人加送酒饌既而求詩書五  
十六字

落木稀疎存葉丹別筵秋興雜悲歡主人愛客願少駐  
老子為君加一餐蕭相河山餘帶礪謝公子弟悉芝蘭  
會因休沐觀歌舞正賴微官謁禁寬

案一本作會因休  
沐還來與翠竹齋

林雪  
後看

苦寒早朝

漏絕星沈十二門，烈風吹耳萬車奔。  
疾驅不敢行馳道，辨色纔能認掖垣。  
病眼無堪頻唾沫，瘁肌時復強噓溫。  
尚衣仍在青冥外，薄願何當獻負暄。

次韻和王舍人酬王工部早朝

原註王時  
監仙源觀

天門金碧照晨光，躍馬鳴珂曉正當。  
人到蓬萊知不夜，地從閭闔負無傍。  
風移宮漏穿花遠，雲覆爐烟繞禁香。



望斷雙鳬候飛鳥空傳詩句首東皇

雨後早朝

雨闌涼生樓閣虛綠槐花落影蕭疎端門立杖交符後  
禁漏傳呼上水初伏閣預聞明詔語退朝潛誦直臣書  
愚忠空覺身無補放去江湖待詔除

春雪早朝和沈編校

曉寒初怪客衣重隱約鐘聲長樂宮出戶萬家橫雪裏  
止車雙闕秀雲中退朝禁柳迎人綠寓直庭花向日紅

縱使著書嘲尚白會應華髮兆非熊

原註漢宮  
有止車門

和牟公野館宿早朝

夢回仙府豁中扃未斷塵緣復戰兢  
交態出門逢楚越俗情開口判淄澠  
夜長鵲鵲偏留月歲盡天河亦有冰  
閭闔晨開車馬集五雲深處望朝昇

嘉祐中與王丞相吳樞密韓端明王學士會飲驥  
驥池上去今將二十年王有感事詩見示次韻

水色林光照舉觴陂塘六月起秋涼  
壯年過事難重得

末路貧交故未忘  
注眼階星元近極  
叱臬甌采不成王  
嚴徐未抵馮唐老  
猶詠君詩意自邛

汾州鄭閔中學士寄蒲萄

漢使于闐伐大宛  
蒲萄天馬徧長安  
絕塵無復千金骨  
結實常迎八月寒  
遠愧故人勤置驛  
每逢樽酒為加餐  
自身不得涼州牧  
何以報君雙玉盤

與倪秀才酒

學子青青佩與衿  
湘中攜手一傷心  
君為壯者我白首

家在秦州書萬金失馬頗能如北叟似鴉那復怪南禽  
相憐羈旅方無友齋贈醇醪稍獻斟

和賈舍人春祠太一壇二首

使節春祠太一壇漢庭儒雅貴兒寬星河回轉開閭闔  
樓觀參差起廣寒月射金盤霜更白風來宮樹雪猶殘  
清詩不減高唐頌萬玉鏘鳴雜珮珊

五城金碧盡樓居西望屯雲藹太虛瑞氣長存春不覺  
美光相屬夜如初歸承宣室雍容問密受神君策畫書

力士傳車空杳邈真遊本自接儲胥

次韻和顧直講

故人相語笑家丘華髮盈簪此滯留無限風光輕過眼  
邇來春色試回頭名園秀木藂幽境紫府真仙熟舊遊  
自是山林懷勝賞非關適野濟吾謀

晚歸

古木號蟬鴉亂棲涼風稍稍襲人衣高樓鼓角悲秋意  
小市漁樵競夕暉雖有簿書容暇豫強從賓旅復來歸

閉門躍馬俱人事吾道何能問是非

燈夕都下

原註十八歲初至都下  
見燈到今四十五年

元夕燈光歲益新羈遊四十五年春垂髫已識東西事  
回首宛如前後身繡轂雕鞍驅不顧丹臺絳闕到無因  
清霜著屋風吹面素月滿庭吾故人

詠旗

玉關歸馬候全師虎落無塵指列旗壯士驩聲歌杖杜  
降人破膽望槍纍禹功遠近逾千歲漢德并容過二儀

青海遠通青塚地  
白羊斜界白狼夷

送張器著作

長裾欲敝二毛侵  
他日聞君東武吟  
騏驥老成方得路  
梧桐焦尾始知音  
蓬萊著作芸香馥  
楚澤絃歌笛竹深  
七十封侯殊未晚  
相看感激壯夫心

又次韻酬著作見寄

粗了文書過目前  
公餘賓宴即歡然  
臙醅趁熟先春味  
官燭供燒合夜煙  
惡土一番生好木  
涸池三面秀紅蓮

不知尚有思人否吟咏來詩幾絕編

次韻王平甫直舍未開梅花

複閣深沈人到稀官梅孤秀及花期地寒竹柏應為伴  
春近冰霜信有時不恨未開煩久待正憐將落賴偏遲  
催人頭白何由奈可在江南寄一枝

初夏喜涼

季月南州雨過春雨餘炎氣即經旬北風一變如秋色  
小屋三間喜病身出戶燕兒矜羽化堆盤梅子薦時新



融峯盛夏含冰雪安得清涼頗借人

上已

風光疊疊逼人來過去清明更不回  
已日家人還被襖  
蜀江清水快流盃關關啼鳥如相和  
冉冉殘花欲盡開  
自笑野心安淡泊亦能隨衆上春臺

南宮鐫宿戲題

複閣深沈橫九衢京塵斷絕閉門居  
士人應怪跳壺術  
漢使曾無繫鴈書  
暝數月華將復缺  
春和庭卉已非初

東風雷雨知何在快意青冥看化魚

題禪寺

錦帆牙櫓四百年曲池歌榭雨淒然又從劫火悲前佛  
猶有靈光閱逝川何處鳴禽新出口幾株喬木上參天  
春遊不負題詩興神助仍因夢阿連

五月望日赴紫宸謁待旦假寐

半夜北風凜凜寒倒衣驚問紫衣班雲容不辨陰晴際  
月色猶迷晦晦間偏喜鳴雞識鐘漏正憐殘夢失江山

濯纓簪筆初無補空愧紛紛數往還

凝翠堂

簷前老竹生無數座上清風處處來俗客不知看好鳥  
紅塵無復污蒼苔兒童戲掃黃金影茗飲時傾碧玉盃  
會待秋霜堅草木簡書羌管倩人裁

綠竹參差平拂簷疎陰掩映似重簾留徑人誰識蔣詡  
開窗吾擬學陶潛古牆莓苔有石色長夏江山如火炎  
避地真宜近幽僻悠悠笑謝歲華淹

劉九經

原註年十八及第

白首儒先困一經此君年少獨聲名  
早知劉氏無蚩者深信宣尼畏後生  
賈誼尚為門下掾終軍仍許出關行  
限年選舉今留滯躍馬羸糧見子情

送隱直

齊楚分飛歲月遷微官落拓竟依然  
青雲可願已三仕白首幾何頻十年  
自昔彈冠深有意到今同病祇相憐  
陰風朔雪河梁別乘興仍思訪戴船

六十二

卷

七

七

彭城集卷十四

欽定四庫全書

彭城集卷十五

宋 劉攽 撰

七言律詩

送李士寧山人

帝城車馬日喧喧  
物外相從意爽然  
自有藥壺容到客  
獨摩金狄嘆流年  
高秋天幕收零雨  
清露風林嘒暮蟬  
曾愧丹砂為狡獪  
更談滄海變桑田

原註子妻常病山人自其家取藥見

遺山人妻能采藥也山人  
又嘗談南海神事甚異

寄彥猷移鎮錢塘

紫垣清切擁鈎陳閣道分明絕漢津  
未怪靈槎滯吳會祇堪藏劍動星辰  
懷金紆組臨鄉社醺酒椎牛宴里人  
行樂從來多壯觀秋風莫使鬢華新

平山堂

危棟層軒不易攀萬峰猶在戶庭間  
長空未省浮雲礙積翠如遮去鳥還  
寡和陽春隨白雪知音流水與高山



吳中辯士嗤枚叟漫說觀濤可慰顏

次韻和秘書省林舍人校書寓興五首

客塵作業通三世儒墨分流至九家投閣何妨惟寂寞  
起予仍自悅紛華夢緣酒食逢芻狗兆應錢財屬火花  
安見高人捐外累獨超無有躡雲霞

百緣不信皆前定千古相矜盡小才夢月豫占沙麓襲  
建章如待柏梁災朱英強欲希無妄萇叔空勞射不來  
聞道蓬萊更清淺便應滄海起塵埃

勇夫常作三軍獲辯士多從五鼎烹到了是非皆妄想  
不緣僥倖亦無名小山叢桂容招隱負郭良田任耦耕  
倚伏會應齊北叟朱愚那復問南榮

事緣難易始相成楹直寧當企棟橫坐論巖廊從自貴  
退棲林壑未為輕俗情熠燿陰中火世路撈捕馬外坑  
要使襟懷似雲月太虛無處不偕行

縮手旁觀哂汗顏未知才與不才間勞生精衛填東海  
多事愚公移北山語道此身甘髮白息機他日賴心閒

良金百煉纔成器躍冶無如鐵石頑

黃朝議賜紫

長年金紫最相宜晚達非干入手遲  
白髮閔勞官職事赤松元作帝王師  
魚銜印鈕丹鱗舞鵲勘袍花爛熳垂  
少似主恩崇舊德掛車無異立朝時

回致仕董中允

富貴致身良獨難寄書空復走長安  
誰能東郭雙穿履徑出都門一掛冠  
家事田廬隨几杖君恩班序接鵷鸞

顏生尚少時無用長鋏因公慨屢彈

次韻酬濮倅李郎中見寄

相見無期得寄聲更憐詩語獨丁寧  
驅之老馬尚知道行矣泥龜甘不靈  
半百光陰頭總白二三朋舊眼偏青  
芳春樽酒何由共悵望東郊長短亭

答仲馮宿興慶池作

車馬還城君肯留通宵歡語破離愁  
水風楊柳猛消暑沙雨芰荷潛造秋  
驚月禽棲時落樹避燈魚鬣暗衝舟

天明紅日驪山道陳迹依稀似夢遊

遊凝祥池飲

柳綠蒲新小曲江洞門岑寂閑僊幢波心殿影遙相況  
花底禽聲各自雙薄俸猶能償酒券老年無事守書窻  
街頭月色緩歸去調笑相隨白玉缸

同都官遊左山晚歸汎舟城濠呈座客

憶過西湖上虎丘雪霜乘興偶來遊蒼崖古木見僧剎  
落日微波迎畫舟從道前塵都妄想亦逢清境為淹留

座中同是東南客，試說風煙似彼不。

初春後園

雜樹無行小徑開，新陽留客去頻回。  
梅花著葉南枝暖，柳帶牽絲春事催。  
池面水光如照鏡，城頭山色勝登臺。  
長年慵懶遺詩句，無奈風煙引興來。

寄人

子雲投閣為奇字，君山殺身非讖書。  
埋獄誰能知匣劍，焚城何意禍池魚。  
賜玦應知謝冠佩，杖藜自爾就田廬。

丈夫蓋棺事乃已白髮勿羞樵與漁

重次新字韻寄子瞻公擇

古來蘇李有三人今復齊名事亦新秀出文華喧右蜀  
指揮能政接東秦定交笑我將迎拙垂老於君意氣親  
似向荆山逢珏玉如從渥水就駢麟

晁美叔前寄知字韻詩別求予詩既已和前篇因  
復用前韻作一篇寄晁

促軫危絃音最悲傷心那得世人知由來入室升堂者

意在高山流水時與子徑為竹林宴到今長記角弓詩  
文昌近極官清貴不負羔羊及素絲

寄熊伯通

竄逐衡湘一病翁望鄉愁對祝融峯不同桂管為元帥  
聞道蒼髯益壯容嶺水分流清注北雪花成片更宜冬  
丈夫生死論交地書札寧當向我慵

原父兄近別入都寄此詩

水鄉春盡事何如綠樹陰成穀雨初杯裏尚餘寒食酒



城中已賣鱠殘魚近來慵懶非常甚別後嬉游益便疎  
省事只圖千日醉勞心不讀五車書

寄王宗傑

謀拙材疎嬾是真豈堪為吏走風塵已知富貴非吾望  
欲以詩書老此身為問折腰從斗米何如白眼看時人  
聞君高卧辭冠冕多幸佯狂亦有鄰

寄張四

天下風塵日可歎豈惟西域與南蠻舉世相爭蝸角裏

此身無事馬蹄間力耕可以得飽食從仕于今真厚顏  
相勸休官勿待漏卜居終近虎丘山

嘉祐末予始為學官同舍六人後二年間錢醇老  
為秘閣校理楊之美出判潁州劉隱之姜至之麻  
仙夫李景真相次為王宮教授曩游無復留者初  
秋夜直偶書寄楊之美

夷路驅車勢易奔青冥縱翼自孤鶩求為散木甘無用  
正似靈光幸獨存汗簡老生躋璧府曳裾賢傳遍王門

子雲寂寞經同病會待庭枝看有孫

寄仲馮

終南秋雨色如新舊國登臨易思人廢塞池臺餘氣象  
埋藏金玉見精神三公七相空丘壠萬戶千門盡棘薪  
安得身隨飛鳥翼相從談笑折西賓

寄館中僚舊

落帆江浦念睽攜遠迹勾吳不自知鼠穴祇緣銜窰藪  
屬車空羨載鳴夷黃雲海色迷仙境丹葉秋風感鬢絲

為誦延年五君詠敢論平子四愁詩

寄刁景純

使君歸老意逍遙黑髮蒼眉見後凋  
自力登山不扶杖  
等閒留客亦通宵  
萬松喬木參雲日  
百頃春苗浸海潮  
徑欲從公十日飲  
艷歌清絕舞妖嬈

寄胡完夫

去國那無鬢髮華  
白沙猶覺勝長沙  
晴雲亂眼江楓色  
宿雨銷魂野菊花  
過客誰能問名姓  
加餐自不厭魚蝦

海陵倉粟年豐熟吾亦慙為飽煖家

寄韓持國

承明不許曳朝衫流落江湖默避讒海氣無時成霧雨  
魚租終歲雜腥鹹喜逢晴日聽鳴鶴却倚津亭數去帆  
。可是絳侯輕賈誼自無張禹託蕭咸

次韻錢虞部九日樂郊有感

前日吟君九日詩名園興盡復傷離浮雲色變曾千古  
黃菊花開又一時鍾子絕絃誰與聽羊公墮淚不堪悲

孤生長抱吹埤感何沉池塘昔夢思

寄王安國時復官大理寺丞監江寧糧料

招隱長吟叢桂詩賜環歡奉璽書歸東郊瘦馬驂騑在

南海明珠薏苡非賓客重尋廷尉寺官曹不遠故山薇

湏還長孺銀青綬

原註韓安國起徙中為梁二千石銀印青綬

聊看翁思

博士衣

原註昌邑太守王生字翁思

酬王定國

卧讀羣言起欲行壯夫為不負平生上書略數三千牘

掉鞅何煩七十城築室曾同老農計寄詩猶見故人情  
病軀嬾厭金門步長愧彤廷午漏聲

酬晁美叔

此身敢與世崢嶸禿髮衰顏太醜生長愧使君心匪石  
每因佳句贈連城病來筋力惟求卧老去文章不近名  
酒量消除百無一未嘗酣暢若為醒

酬章質夫

晚悟頭陀塵不侵何妨居士著朝簪故人自是相忘者

秀句依然莫逆心  
翠柏高松存茂悅  
潛鱗羈羽任飛沈  
萬緣起滅空花喻  
可向空花擬重尋

次韻酬韓三相公見寄

自昔羊公峴首遊  
譙渦開府祇千秋

案渦水在譙縣西四十八里

韋

平繼相聞詩禮魯  
衛提衡絕輩流  
功與榮名逾響捷  
福

隨陽報似言酬  
孤生承乏曾何數  
玉鉉龍文顧瓦甌

原註

坐相初登第先太師方鎮亳州公與弟兄歸觀題名在壁今坐相既登鉤軸而介弟玉汝太中復在樞府

酬王平甫



黯澹流雲索莫風曉瞻雙闕望蒼龍秋還鷹隼非無意  
涼入楓槐不變容寓直鬢毛悲騎省讎書編簡待陳農  
黃花黃葉催時節倩問誰家酒最醲

次韻酬孫少述見寄

退尺無緣復枉尋信書那免不通令爭評玉價應輸厚  
能為魚謀豈厭深待得散人如散木敢論機械有機心  
子荆詩筆興公賦萬事慙君早息陰

次韻酬顧子敦見寄

丹砂未化不成仙  
白髮衰容五十年  
已自灰心當世事  
更能回首大夫賢  
對棊可待矜無敵  
讀易聊須記絕編  
寄語山陰顧元歎  
人今同病始相憐

次韻酬曹極司法

越紙題詩寄我來  
君家八斗定多才  
冰清玉潤高風舊  
白雪陽春病眼開  
長見夔龍參濟哲  
不聞徐樂避雄猜  
自緣衰老無能解  
戰勝方當去剪萊

次韻酬孫少述

使節皆窮濁水源降羌係踵慕稱藩強顏假守真無補  
取笑高人不憚煩豈有天池容斥鷃莫將溝斷比犧樽  
南山若許堪歸老二頃平田十畝園

酬韓相公

病卧湘山念所親惟公長記可憐人寄書不啻從容語  
問舍仍慙消息真半死孤松函徵羽戀軒瘦馬強精神  
祁奚鮑叔寧欺我三入今看總四鄰

酬劉宜甫

萬價睢盱倚市平百工紛紜待宮成神仙亦有丹臺籍  
壯士當為猛虎行畢娶幸能同尚子敝衣終不效唐生  
洞天欲到先能說十二樓前列五城

酬王定國五首

放逐朝恩本自優衡山猶是古荊州百年生計羞蝸角  
九品人情看馬頭炎瘴還歸君不恙風波別去我離憂  
柔姬一唱陽關曲獨任剛腸亦淚流

豈有多方書五車爾來留意就丹砂誰將飽食倉中鼠

換取紅蓮火裏花三顧祇能矜彼善萬鍾多不悟堪嗟  
蟠桃結實何難俟況值安期棗似瓜

貴公孫子族關西失路青冥翅羽垂當世朋游皆父行  
古人方略足肩隨薄材老去歡傾蓋直氣交新喜盡規  
滿目江山屢回首白雲流水付心期

江岸青楓連白蘋片帆如箭射千鈞風煙何處喧墟市  
簫鼓誰家賽水神鴈鶩陂湖爭就暖杉松廬舍不知貧  
滯淫何必多離恨譬似生為澤國人

願賜支離不肖身幅巾田野任天真我行三逕一廛地  
君即東阡南陌人晏卧自輕車結駟食薇從使旣生塵  
漳濱卓犖桓公健盛德由來必有鄰

承天寺翠景亭

一山篁竹間松杉伏虎猶存居士庵鐘磬有時聞絕壁  
漁樵將晚會平潭薄雲未解成春雨返照偏能破夕嵐  
我所思人桂林外憑高惆悵贈雙南

松有喬林桂有叢石梯苔壁興無窮快心疊嶂雲如掃

會意澄波日正中修竹緣崖高竦竦早梅飄雪細瓏瓏  
狂吟大叫青冥外驚看漁郎下釣筒

遣懷

六年長病每愁予末疾風淫豈易除予何曾暫忘屢  
拮据空恨不能書苦遭白髮無他術常得中醫亦自如  
欲向明廷乞骸骨角巾藜杖整柴車

種竹重寄子瞻

官曹何獨異吾廬修竹成林手種初未必七賢皆縱逸

因從三昧得無餘風聲似水還成韻日影填金尚覺疎  
舊事喜君能記憶興來當復埽牆書

周禮兄弟得解寄王教授察推

今秋鄉里薦賢書年少周郎智有餘全得鳳毛增意氣  
正聯鴻翼上空虛汝南月旦評無愧諸老先生謝不如  
衰白慙居丈人行長風猶欲助吹噓

濟陰縣新成官廨贈知縣著作

鼠牙雀角穿垣屋墨綬銅章愧吏民製錦可無容膝地



戴星親作執柯人奮飛翬雉簷雙翼積疊魚龍瓦萬鱗  
若比治蒲增四善種花仍欲笑安仁

送學正李秀才歸蜀

金馬書來信不違相如獨授七經歸郡迎徐孺知懸榻  
家望蘇秦想下機峽底奔雷江亂湧嶺頭如雨石交飛  
丙魚邨酒歡閭里悔殺京塵化素衣

清門

清門早日素風傳正在圖書翰墨間惠子應輸五車富

相如才授七經還朱欄碧瓦森華屋喬木浮雲滿舊山  
渥水丹丘遠千里鳳雛神驥落人寰

蜀山漠漠水溶溶高閣經營得我公萬軸鈎黃無脫簡  
千尋清白有遺風地留神苑逍遙外天占仙壺縹緲中  
公是蓬萊真學士故應乘此問鴻蒙

西省種竹偶書呈同省諸公并寄鄧蘇二翰林

五月十三竹迷日今年仍自晏陰初分將池籟千竿翠  
就得楓槐一雨餘紅葉蒼苔相映帶南榮北戶頗蕭疎

欲為林下諸君詠便是濤戎亦盡書

長安城南

三百離宮何處尋  
泰山相向畫陰陰  
城南地去天尺五  
杜曲田皆畝一金  
源發清泉隨種稻  
穠生脩竹自成林  
老年欲為五陵客  
射獵往來長縱心

送陳成伯出牧陝府

陳公六十丐朱輪  
豪氣誰憐亦為貧  
原上鵲鵲深涕淚  
檻間騏驎發精神  
山違折坂皆夷路  
河透醞渠即要津

千歲海棠死鉞色因君光彩會如新

次韻蘇子瞻觀范景仁新樂

大儒高論本升堂物外光陰更不忙樂預請觀同季子  
書雖未見屬黃香正聲仍許三人和古尺應無一黍長  
鶴舞鳳儀時莫識勾陳武帳省中央

觀范公樂有感

蜀公精思古人為論樂成書八十時那有伯牙為聽者  
空令一足尚傳疑羊山鉅黍知無用牛鐸遺音自不欺

便欲祠君從樂祖出門陳迹奈深悲

贈黃知錄

此身羈宦閉門居里巷蕭條到客疎  
道舊瀟湘與誰可無雙江夏即君歟  
塢中吹笛無畱事悵望何人得異書  
翠羽明珠生海濤更知名下不應虛

題朱陵閣

蒼煙漠漠石粼粼坐倚山顛瞰水濱  
開闔波濤專閱世春秋風月不愁人  
未知孤鳥歸飛意聊問長松老在身

信有朱陵仙府在玉樓珠殿闕為銀

步瀛閣

方塘十畝水幽幽魚自潛深鳥自浮為有風光陶永日  
故題亭榭擬滄洲旋移修竹看停雪未落垂楊正奈秋  
客到便留同一醉山公不問習池遊

水閣雨中

雨濯苔衣水鏡明風搖荷扇露珠傾空堂送暑蕭蕭意  
高樹吟秋惻惻聲笑以稻梁邀鶴舞莫將鐘鼓使魚驚

烟雲岑寂埃塵絕頗愛孤舟盡日橫

中秋望月

中秋自昔賞金波爽氣初凝暑頓過風雨定時看有數  
樓臺高處得偏多正憐白髮宜相照不為衰顏惜暫酡  
願假長繩留玉兔望舒能與倩夸娥

同諸公登秘閣

複閣橫雲不易登宮烟漠漠柳層層始知竒獸名天祿  
徧見羣書蠹羽陵此去杳冥無幾許向來游集類多能

秋風撩亂吹蓬鬢老愧諸公話得朋

東園新種雜樹

青苔翠竹吾人好穿徑誅茅野老家豈為素封增橘樹  
還知避世種桃花會因叢桂留騷客却憶安榴逐漢槎  
已有風光催物色定甘羈旅待年華

題深甫新種樹

壽張樹梓待成器方朔種桃因著花古人既信十年計  
野老今知五柳家幽鳥鳴春能信宿翠陰向暑會交加



甘棠不忘角弓賦與子相好情無涯

長城逢周鼎

田家秋收朝不歸客子到門休馬蹄偶倩樵兒遠相問  
倏乘黃犢仍有携白頭蕭颯映紗帽薄酒清冷將臃難  
幽興每於山野盡為君一醉判如泥

臘月十九日雨後

當年過臘雪猶繁澤國春光已可憐初怪醉魂迷甲子  
稍知客路斷山川柳條着雨看成綠花蘂融冰乍欲燃

避地早辭車馬迹杖藜猶有里中賢

冬至偶作

郡南百里即羣舒留滯頻驚歲月除閒過著慵思運甃  
老來多忘却抄書水鄉鳴鴈寒無數山路幽芳冷自如  
畫坐偏知日南極十分紅影在吾廬

國子監御書閣觀雨同張主簿

閣外涼風得凭欄陰晴相望一城間過雲快雨噴濃墨  
收水長虹墮缺環斜直樓臺經灑濯空無燕雀自飛還

聖朝百吏都勤事

原註漢詔  
有勤事吏

優借儒官到老閒

重題間字韻

棟宇雲生覆畫欄  
御風身在杳冥間  
露頭不覺吹烏帽  
熱手猶須握冷環  
欲斷嘶蟬仍自續  
倦飛孤鳥亦知還  
君看老驥驚秋意  
日暮涼生十二閑

雲水

雲水東南萬里來  
宦情羈思兩悠哉  
舊交備禮矜垂老  
晚輩多端謗不材  
匠石頗知幾死木  
火爐容有復然灰

過梅收潦秋風起待得鴻飛燕子回

和王仲至錢塘

胥山樓閣半空虛春雨秋風興有餘  
溪女戴花浮水艦潮兒戴火棹雷車  
君尋故事應如夢我得新詩欲信書  
正是霜天向搖落拂衣猶自及鱸魚

賀王丞相賜玉帶

捷書吉語報安西辨色彤廷喜氣齊  
蕭相論功非汗馬晉公成事有通犀  
尚方製作皆金玉委佩光華想虹蜺

欲問九環加賜袞何如判白授封圭

鳳凰臺

江水中分白鷺飛鍾山秀出衆山微鳳凰去後高臺在  
麋鹿遊來舊國非萬里孤帆長在目夕陽游子憺忘歸  
六朝人物都荒草但有寒潮信不違

郡齋即事

鶴髮霜髯新復新為郎補吏兩因循爭先不及三千客  
顧後猶容五十人絕學捐書從佚老曲肱飲水會忘貧

江湖極目連天白，照影知無纓上塵。

與宋次道舍人同在殿中覆考進士，次道子姪同。

就御試，贈次道二首。

池上君今得鳳毛，階庭蘭玉見兒曹。  
橫參氣象開衡石，丹桂芬香近赭袍。  
冀北羣空經相馬，海濱人去復連鰲。  
西毫里第烏衣巷，賀客無辭應接勞。

不恨郎潛有二毛，喜從仙禁接官曹。  
重吟紫殿森珠網，縱觀諸郎奪錦袍。  
汗血來時皆驥子，神仙不動倚靈輶。

明堂梁棟掄材盡世上那知伐斲勞

燕子來馬上作

馬上春寒透客衣半晴天氣燕飛飛不知社日明朝是  
轉憶吾廬共爾歸風外輕輕雙翼疾沙邊款款數聲微  
畏人自習人間世何事江鷗浪見機

酬章朝散

本無材畫備驅馳豈有文章結主知廟鼎陳前羞瓠落  
井泉方潔懼併羸晚交賢傑真難得辱在泥塗祇自嗤

澧有芳蘭沅有茝夢魂無日不相思

原註楚辭云沅有茝兮澧有蘭思公

子分未

敢言

事無機變即無疑此意唯當靜者知末路風波成失所  
歲寒霜雪正同時勞生毫髮差千里醉眼須臾已萬期  
江上鯉魚天上鴈寄書嫌少不嫌遲

出汜水關

洛河嚴鼓夜方中上馬西郊滿面風照野月華鋪水白  
轉山銀燭列星紅視祠太一觀燿火從獵長楊賦射熊



壯觀已隨陵谷變龍旌搖颺倚秋空

齊州史君學士有游山詩學官諸生咸和史君又有詩二章贈之以刻石摹本示予因次韻

辨如流輟解連環稷下諸生大小山幕府名聲收藉甚  
雲泉氣味屬偷閒茂林深壑逢迎際細草穠花次序間  
值有羽人招隱士想君乘興不知還

終日塵勞駮轡還乍臨清濟看羣山飛來獨鶴應知倦  
過去長雲本自閒開國東西誇十二待賢季孟哂中間

吟君詩句心蕭散  
舊觀神明覺  
頗還

還王平甫秀才詩稿

王子能詩古不如  
壯心豪氣未應除  
百年總付人間世  
一腹都容天下書  
白雪關山來騷裏  
綠萍池沼秀芙渠  
窮愁已作無聞老  
相愧臨濠一問漁

見蘇子瞻所作小詩因寄

千里相思無見期  
喜聞樂府短長詩  
靈均此秘未曾覩  
郢客探高空自欺  
不怪少年為狡獪  
定應師法授微辭

吳娃齊女聲如玉遙想明眸嚙黛時

得奉世寄詩

江城花柳復殘春每上高樓望所親身滯蠻舒誰與語  
書來子弟爾成人老侵鬚鬢莖莖白情在篇章字字新  
幸有竹林堪縱傲罷官真作自由身

偶題

人間變化亦何常不在他生與彼方病後公羊哀作虎  
顧時司馬懿為狼龍眠頭長參天木龜老猶堵病叟床

又有此曹惟奈久非干天地日偏長

次韻和通判庫部會基

三百縱橫事不平古今仙俗判昏明已居勝勢誰前敵  
獨暗機先誤必爭寥落寒星天欲曉稀疎過雁雨初晴  
南陽畫諾庭無訟正賴君詩得此聲

叔父寄李氏庶子泉銘

翠壁清泉庶子銘文工境絕兩知名埋藏雲外山神護  
流落人間俗眼驚恨不陪遊如阮籍遠憐模寫到蠻荆

古書豈獨記名姓自恐疎慵學不成

彭城集卷十五

欽定四庫全書

彭城集卷十六

宋 劉攽 撰

五言長律

章武殿

歷數歸真主乾坤仗義兵南夷長後服下國怨西征麋  
鹿荒吳苑梯航聚易京春蠶那恃力朝菌欲長生雷雨  
隨金鼓鷹鷂起旆旌靈旗概牛斗白羽射欃槍散地人

誰保連薨火徹明晨門迎短篋死骨斷長鯨父老前流  
涕農夫未釋耕將軍薦牛酒愷樂會韶韻號滅虞何恃  
崇亡紂亦傾一戎終薄伐再駕就昇平舊邑更脩武行  
宮即顧成奎芒垂篆刻天質望氛清羽衛嚴丹極潮音  
接化城欲回江海水都作頌歌聲

溪上

窄地穿茨拙高成晚日斜竹籬侵水面溪女浣汀沙老  
樹垂朱實懸藤結白花綠萍浮碎點芳杜上新芽一邑



過千室十金無數家魚蝦與菰米惆悵此生涯

和裴庫部十二韻

懷人存蔽芾招隱賦宵衣賢傑多能事音微自不瑕偶  
然新樸斲一笑為謹呀夏屋已隆棟清池非漚麻望矚  
隨朔鴈坐久至昏鴉好事逢諸彥佳聲播四遐燕游安  
以樂詩語正而葩霜應豐山石灰飛河內葭涼秋將落  
帽斜漢挹浮槎老木圍岑寂蒼苔積鬢聲髣瑤光天不  
遠圭影日無差莫怪長吟苦良金出汰沙

南征二首

漢皇開五嶺虞帝事三苗定有南征問遙知用武朝前  
籌皆廟略選士剋風颭潦水江湖大雲山故國遙天陰  
凝殺氣師老聽哀謠猿鶴愁君子鼉鼉憶架橋繡衣方  
責戰虎節竟乘輶白骨不歸葬冤魂誰為招猶傳發閭  
左願得聽簫韶旅泊時流動何由問九霄

楊越舊秦兵苗頌尚禹征初驚一使任那用萬人行友  
戶凝昏浸滄波觸駭鯨越裳無信息銅柱定將傾服嶺

東南尉戈舩萬里程江通夜郎道秋入伏波營插羽頻  
封檄馳輶屢請纓介鱗悲物色猿鶴悵民生幾日封京  
觀歸時卷旆旌休聞七科戍無用五陽兵海國犀牛遠  
南琛紫貝輕平生一長劍歲暮望櫓槍

寄橙與獻臣

清霜夜漠漠佳實曉纍纍鵲殼攢修幹金華耀夙曦狂  
醒香處析瘠渴味餘衰採摘悲凡口漂零恐後時頌聲

騷客誤

原註屈原  
有橘頌

錫貢禹書遺惆悵生南國煩君品藻

詞

酬臨濮劉推官

治民非已長那得士心降為問來鳴鳳何如止吠厖壺  
餐慙鼎食鉛割謝矛鏃辯士更持節佳兵正上瀧薄田  
桑十畝小市釀千缸自喜庭無訟寧論智少雙陪京開  
左輔振鐸服中邦禁鬱分留印天枝泣建幢孤生老將  
至壹意信猶砮賴倚絃歌化餘風勉政龐

送賈士彥延平知光化縣

名家千里駒富學五車書柱史文無害絃歌智有餘素  
風存翰墨陰德在門閭江漢子男邑穀城桑柘墟曾為  
都尉治今亦萬家居安穩飛鳧舄新鮮縮項魚繡衣夸  
里父壽酒薦親輿不作期年別看君就詔除

送高麗使

絕域求通使皇華益藉才男兒萬里志笑語片帆開積  
鹵生陰火奔濤起晝雷曝鱗成島嶼吐氣誤樓臺城邑  
東迎日居人學用杯詩書自天性冠帶及家陪歲月如

勤止登臨亦壯哉，威聲逾肅慎仙事。  
指蓬萊鵬向南溟，近槎常八月來。  
言瞻析津次遙見二星回。

次韻和宋職方北樓

勝事略就手茲樓，無復加棟梁宏可愛。  
丹碧麗非華風，月登臨最川原眺望。  
賒斗城知日近瀛海，自雲遮杖屨。  
歡乘興文移謹報衙，畫閒禽語靜。  
歲熟市聲譁柳影重，重幕蓮香處處。  
霞舳艫隨渚遠，睥睨向人斜。  
話聽游童樂詩煩上客誇，國風麟趾應賓宴。  
鹿鳴嘉鵬鶚無餘力。

騏驎不待撾衰遲竟何補襍被念還家

復次前韻

仙游欺緬邈古事厭增加自我新形勝因之翫物華不  
勞工子勸無價境天賒雲構森如畫翬飛勢莫遮靜看  
梁燕賀閒聽野蜂衙曹事初無壅軍聲信不譁倚欄歌  
白雪為客進流霞快意涼風起餘歡素月斜吳趨應有  
始齊難詎為誇夏日思王粲名流得孟嘉優游琴八疊  
悲壯鼓三撾遍看題詩語飄然自一家

既和宋君佳篇因取加字韻中所未用者別為十

二韻

板築廢已久樓居仍可嗟敢辭才不逮何說智無涯史  
例同新作民謠異刻奢棟梁虹夭矯軒檻獸盤拏萬室  
瞻華宇千兵擁建牙浮雲生柱礎杲日透窓紗明滅穿  
林水稠重覆塹花長空指去鷺過雨亂鳴蛙屢獲詩人  
賦時紆長者車薦觴凝縹白諧語繆壺甌隱吏容攀桂  
終更遽及瓜多慙雙鬢雪蕭颯對文綯



合加字韻兩篇二十四字成一章更互次之詠曹  
之土風并叙出處寄呈司年職方

漢郡王封寵周宗伯命加犬牙基自若麟趾歎于嗟陵  
谷隨人世春秋積歲華洩雲餘薈蔚浮濟變津涯端木  
倦游學朱公精貸賒於今富而麗遺俗儉寧奢使轍常  
交錯京藩倚扞遮鋤鉤非盜用簫勺換兵拏樸直叨三  
組工夫盡兩衙戎容剖符虎士氣肅旗牙圍土幾無訟  
虛庭不禁譁對碁銷白晝清嘯岸烏紗池館澄潮水樓

譙冠暝霞綠梢簷外柳紅朶砌前花徙倚危欄峻行來  
繚徑斜巢林安短翼擅壑愧跳蛙夙昔未更事游談多  
自誇奏盈方朔牘書過惠施車臧室初縻迹連城晚拜  
嘉華顛看欲落病齒不勝齟珠琲輕魚目桐絲陋馬撾  
敢論雞似鳳願食棗如瓜臺妙前辭滿安輿久臥家最  
容高尚志那肯待青綢

又十二韻

絕境可遺老清心仍去邪樓頭喧燕雀川面動龍蛇碧

瓦浮煙素朱甍麗日報倚風時坐嘯乘月更吹笳庭樾  
交傾蓋池房雜舞榭涼秋乘爽塏吉歲驗汙邪厨釀全  
欺魯兒歌習陋巴林珍餉桃李溪飯列魚蝦勝賞須神  
會浮名祇盜夸誰能貪課最本自學禪迦羈旅枝栖鵲  
田園舍負蝸蕭條看白鬢早晚得丹砂

酬范判官喜雨

一旬天再雨惠澤夜來深震發雷霆事榮華卉木心問  
年如隔併閱日屢辛壬安水江千里良田畝一金劬農

非有銜望歲忽為霖雖雉依青隴跳魚出廢渚夢成池  
工作喜見洛生吟破敵聯飛鏹高張信雅琴緒風開畫  
色遲日媚花陰更有資清興連峯映碧潯

赴官京東同舍諸公觀音院見餞有贈并簡不至  
者

今日承人乏東州假傳車勞生復去國垂老欲捐書斗  
酒相為樂諸家食有魚華燈續光景鳴笛問吹噓即事  
已陳迹懷人方跂予要官多謁禁數子莫情疎啼鳥春

猶淺高花日勝初朝回應見念會語殿中廬

景德寺河沙院餞蘇安上知泰州劉元忠河北都

運分題得無字

今朝一樽酒聊與故人俱非復少年日深驚別意殊燕  
雲低朔漠楚水向江湖報國不一事出門成異塗騰鱗  
安浩蕩雋翼就虛無應笑白頭老閉關方據梧

過太康縣此路入亳州云是先帝昔東幸時馳道  
也馬上口占行二十里成三十韻

維昔東巡狩天王景宅朝金樞隱馳道象載下招搖呂  
應青雲近闕迎紫氣遙旄頭前詔羿陪乘後征僑奉引  
三司肅中堅萬馬調旂常亂辰象劒佩雜瓊瑤多士和  
相讓諸侯貴不驕海神來積雪仙馭會祥飈象帝初觀  
妙猶龍此見譙強名大樸著將隱德音昭上善泉仍潔  
知常檜後凋虛心明左契聞道首參寥絳節賓閒館璇  
宮盛綺寮洞天留白日書法秘青霄瑄玉嚴禋祀歌童  
采夜謠衆神如向座佳氣鬱通宵隴麥聞重秀房芝寧

紫茵醴泉甘愈疾舞鳳樂儀韶舉翼王喬烏排雲子晉  
蕭頌釐知簡簡奏賦欲飄飄麗澤驚雷雨鴻恩霈蓼蕭  
百年皆就見比屋幸寬徭牧馬猶如隗封人預祝堯歡  
聲喧望幸舊里不崇朝萬域車書混重明祲消鼎成  
因脫屣桑變忽觀潮雲霧常疑祀衣冠祇葬橋藏書思  
柱史問遠謬祈招躍馬遵遺轍談王就采樵生遲千一  
旦無所效芻蕘

次韻和石曼卿泰山

步至東山表纔知嶽鎮尊百川趨渤碣一柱際乾坤託  
始無懷氏談更洛誦孫後王崇檢玉方士說天門巖石  
居凝命羣峯遠駿奔陰陽殊雨霽朝夕異涼溫學者譏  
秦事功臣誓漢恩氣連滄海碧影變濁河渾候日來丁  
夜捫星待合昏仙真疑史闕宮殿謹司存落水雷穿谷  
危松柏擁根更尋宣父志雅意屬崦嵫

將至洛中先寄宋次道諸幕府

頻年洛陽道秋月照征車關口朝煙上伊川曉日初艤



船看飲馬投策數游魚蟬嘒隨林靜鐘鳴應谷虛夙齡  
懷勝尚吏役久愁予及此娛山水翻知喜簡書名都士  
淵藪盛德世璠璣羈旅如傾蓋詹言興有餘

錢子高舉賢良中科寄賀子飛

當世英雄穀連年伯仲賢友于聲競爽敵萬智無前讜  
議天人際馳辭日月邊會驚文得鳳真謂筆如椽萬乘  
親前席諸生敢比肩晚成無近器妙選悉青錢濟美高  
陽舊傳經韋氏專公侯將必復廊廟定誰先步武青雲

接官曹畫省聯輶羣看赤驥洵直想朱絃德賞今誰擬  
才難古亦然從容照棣萼聞望已陶甄夏屋方隆棟雲  
樞穩濟川那令得賢頌祇貴漢王淵

送裴二知蘇州

著書玄尚白送客鬼揶揄積水望江海秋風吹軸轡貴  
人千騎長紫綬左魚符遺愛留南國歡聲接舊吳曉霜  
繁橘柚過雨熟菰蒲安得如王子從君飛隻鳥

和原父同江鄰幾過淨土院觀古殿吳道子畫楊

惠之塑像及顯僧傳當世貴人形骨仁僧鼓琴作  
真賞非俗嗜雅游知勝緣百身化前佛方丈納諸天工  
以智自表名由高益傳吳生擅粉繪楊氏妙鈞埏能事  
古未盡希聲今亦然仵圖觀肖像撫弔置鳴絃理會均  
聞見神交遺後先衣冠若對面山水欲忘年子墨臺中  
妙仙翁樹下賢新詩俱絕唱塵土更餘妍

同徐監簿作水始水

霜落歲將晏風生水始水猶殘夏蟲怪初比玉壺凝氣

襲璇源潔光搖寶鑑澄涵虛同凜凜履薄乍兢兢魚鱉  
悲潛伏江湖息沸騰凌陰如獻納會是却炎蒸

送韓子華奉使安撫江南

漢庭重八使同日出東都仗節年仍少埋輪氣不孤詔  
書敦直指懸弩肅前驅宣布君恩被周爰楚澤紆秋風  
捲旌旆桂楫上江湖遊子故鄉在相思天一隅

送張益宣州法曹

掾曹仁恕用郎選孝廉為之子文無害居延敢決疑一

王除制作三尺著毫釐過眼皆成誦讎書自所宜

原註  
王君

編前後制敕  
為一書最精

察廉時爾貴治道吏為師去去弦歌化當

如別後思

### 郊祀慶成詩

聖瑞歸文子珍符屬

原註  
音燭

孝孫儲精凝景命端拱輯羣

臣禮樂成中典人神定一尊亮章新物覩咸秩備司存

成德兼明察彌文付討論積高參斗極因吉際乾坤候

景迎長日萌芽發舊根律風乘廣莫卦氣起昆侖閭闔

開黃道星辰拱紫垣奉瑄嚴太一推策本軒轅八廟森  
重構諸侯盛駿奔薦馨光祿玉告嘏逮歸牖旒纛羅千  
乘旗旛徑九門龍蛇影搖動鵝鵲勢飛翻士勇歡鳧藻  
天暝候晏溫幔城橫象魏玉果會春園嚴警連宵鑿周  
廬次屬韃望雲舒錦石揖月上金盆廣樂謹來格升烟  
續載燔頌釐如響答終事寂無喧輦路祥飈轉端門旭  
日暎天雞還自舞仙鶴為孤騫河漢驚垂象雷霆決厚  
恩晝衣期不犯肺石更何冤長樂尊無貳椒房慶已蕃

睿心先廣愛大策重臨軒瑞典兼河洛歡心極鎮藩名  
山已望幸天意肯周爰願上公車奏來趨白獸樽心知  
搢紳義展采詎難言

次韻和王正仲熙寧郊祀二十韻

駿命膺長發鴻圖本慎徽八方星拱極四海日升暉舊  
典增咸秩彌文示表微聖時均玉燭天統正璿璣南極  
迎陽復陰泉候氣歸積高常眷顧昭孝每毋違羽衛來  
雙闕和鑾並六飛風霆齊命令龍虎會旗旂帳殿層城

暮金波列宿稀嚴更虛夜鑿雕輦下彤闈廣樂千人唱  
升煙萬目睇衆神知受記象物競來依陟降兼明察圓  
方比範圍送音仍鸞鸞昇福想霏霏澤蘇羣動春陽  
暢堦扉慶深周揭厲感極至獻欸多士參鳴玉微生廁  
皐衣肅雍瞻帝武奉引近天威儒館鵷鸞舊長謠錦繡  
輝因知子雲賦何足頌巍巍

聞蜀中大水寄閬中諸弟

蜀嶺參天近巴江向海迂百城同暗谷獨鳥視前途六



月蒸雲甚長風驟雨俱漏天疇得補深峽不時輸回首  
蛇蛟鬪傷心虎豹呼劒闕愁斷棧天漢逼乘桴臂飲通  
殊俗巢居自一隅遺黎待螺蚌小邑斷樵蘇絕域飛黃  
鵠仙人用隻鳬清秋已收潦問爾麗泥塗

馮當世生日

申甫維崧嶽東方本歲星舊書容盡信成事况親聆南  
紀浮江漢青熒變項冥氣和方毓粹地勝已儲靈德宇  
何寥廓斯文實典刑龍駒來汗血霜刃脫青萍智略聯

三捷規模壯六經羽翰驚海運辰象屬天局回首煙霄  
近橫雲漢閣青河圖開秘奧龍節付儀形萬里風聲肅  
三年楚俗寧里毗羞蝶竦鄉校謹螟蛉聖主思霖雨羣  
生望大庭指期調鼎實洗眼頌椿齡授易嘗占晉論詩  
竊次駒莫言狂簡士足記景鐘銘

陽月方開旦商行接素秋聲華臨盛際勲業動前修舊  
物詩兼禮公望礪與舟諫行扶廟算威克弊邦讎翻欲  
危晁氏皆能苦絳侯孤城雖莫可具美亦誰侮北闕虛

前事南冠記昔遊客惟論藥餌書不號窮愁迴有閒中  
趣高於物外求賓朋依白傳潤澤借裴休跂也身方族  
時哉歲欲道愁無縮地術賴有置書郵理楫王猷拙稱  
觴小陸優傾心日夜急滾滾大江流

送子惇出使河北

禹績基壺口堯仁被冀方官迎赤車使詔選瑣闥郎力  
學推元稹高才屬長康壯懷來慷慨得志自軒昂愛直  
容知默中和異吐剛一臺傳駁議二府見分章前效平

原淺嚴威夏日長居常祇逢掖試躍即干將雲漢昭回  
地鵷鷺八九行穹廬休夕拜鞬弩備晨裝泮水成滔陸  
流庸頗異鄉挂冠勞畚鍤佩犢問耕桑哺乳增飪粥完  
膚滌痼瘡朴忠將漕最醇厚訓兵強冀馬羅馳傳河魚  
飽食魴細書夸睇視淳耐沃煩腸肯作田園計寧嫌鬢  
髮蒼能令老者奮直與大鵬翔處世當何語懷君豈易  
忘哂由終所畏與點自知狂

卜居書懷

漆雕未能信陽甫免歸居理以逍遙得材由濩落踈狹  
才輕勢利小隱幸林廬藿食由來事茅茨不顧餘南簷  
容曝日側徑喜攜鋤筋力吾如此功名世有諸憶初干  
萬乘徒步謁公車投射東堂策歸來北闕書先鳴煩指  
日弱羽愧吹噓雲雨非人力泥塗亦詔除江湖輕乘鴈  
鐘鼓陋鷄鶩有道翻羞卷迷津幸遂初幽棲謝車馬至  
樂狎樵漁述作稱狂簡誰能問起予

渭水

鳥鼠流清渭岍岐導衆山懸車循暗谷斷棧出重關長  
路去未已連峯深更艱秋高木落外天曩鳥飛間日出  
看羣動煙收認百蠻別腸逾九絕愁淚獨長潛立志薄  
軒冕隱居宜草菅自甘家食薄還愛綵衣斑從吏負風  
願辭親何厚顏簡書今可畏幕府尚餘閒援叫無勞思  
鴻冥不易攀歸來城闕望但見白雲還

致齋中太一宮見屏風有唐賢和常舍人詩因次  
韻寄子瞻內翰子由侍郎子開舍人穆父待制數

公皆嘗祠太一也

禁掖下祠宮青槐輦道通薄雲收霽雨初夏接薰風將  
旦羣陰伏齋居百慮空夢遊如有遇反聽更能聽祕祝  
寧神外多儀拜貺中佐靈猶五帝執事本三宮象海鰲  
山峻翻堦藥秀紅守儒嚴講幄起草麗談叢夙昔嬉遊  
並神仙步武同吹藜驚燭火抱法想江楓已老仍書癖  
懷賢愧易東君王問無擇留意屬谿工

羽林通孝經

聖治周方域儒風暨羽林一經嚴授業五孝得潛心騎  
獵宸遊簡嚴廬禁掖深披文知行在即事亦官箴訓勇  
寧慙晉專門詎屬參從茲六郡俗不羨滿籛金

寄杭州通判蘇子瞻海州使君孫巨源

原註時罷  
泰州通判

淞水三江外朐山百郡東專城須聞望半刺亦才雄浪  
海元無際吳潮近峽中茵憑那獨異翰墨自兼工追昔  
賢良舉殊時步武同百篇傳冠古半策已全功咫尺騰  
霄使回旋著籍通龍媒流汗血鳳羽雜鳧翁烈士猶難



進清朝各願忠伏蒲寧曲學鳴鼓尚深攻物理安圓鑿  
人倫陋發蒙俟河愁敝軍破膽忤豐隆力擠膠西相廉  
欺第五公絕絃迷促軫折翼創虛弓卧閣寧多病治中  
有舊風從容付丞史咻噢及兒童使者誅求急王人禮  
數崇湯年偏一溉稷御不終窮高宴延仙伯閒遊歷梵  
宮怒濤翻練白浴日上霞紅沙鮎能藏蟹江鳧不慕鴻  
五雲瞻碣石七澤望青楓瓜戍留麋暝  
原註音軟漢書作畋誤茅  
心憶桂叢賜環聊袞袞遺樸漫忡忡困學今將落生涯

祇屢空頭風吹過雨鬢雪亂飛蓬龜死寧遺策鸞棲豈  
願寵勞生俱夢寐有道或瘖聾絕唱常難和幽光更待  
融知音懷感慨不獨寄絲桐

寄梅聖俞江鄰幾韓持國

直諒多聞友衣冠領袖賢平生三逕樂少別四時遷曲  
策春山秘絃歌壁水園吳門真養性委吏故依然杖履  
兼閭里詩文孰後先風雲多變態鞭弭屢周旋清汝流  
無極維嵩地少偏微官非擇取勝事偶陳前遲日消基

局殘春賴醉眠時從謝客詠不廢遠公禪吏課輕涓露  
官箴恨縹牽裹糧嗟不遂回首鎮幽捐

寄王子直謝師宰

自昔東南美由來王謝郎提衡俱射策繼踵事專場凡  
馬驚騏驎羣蛩下鳳凰同時冠後進舉國誦成章賈子  
諸王服蕭生舊友光青冥看咫尺雲路更翱翔

游東寺

籃輿出乘興佳客不相遺水色鳴騶外林光倚蓋時寒

餘草初變風煦柳先知  
複閣披襟久迴廊步屨遲招提  
應不厭幽熟重前期會待花如霰  
壺觴約自隨

江漢

江漢繫常武苗民俟舞階百蠻時暴桀終古事威懷  
壤穴深潛蟻山林盛鬪豺墮鳶愁瘴霧吹蠱厭昏霾  
淫毒皆沙蜮跳梁自井蛙幾成分服嶺垂欲罷朱崖  
元帥全軍出天王太室齋鑿門資感奮負羽必誰差  
壯氣隨霆擊先聲甚雨偕遊魂蚩兩輩賈勇洎吾儕  
略野窮飛鳥

園城盡析骸饑啼兒宛轉怨哭鬼歐哇破竹餘銛刃焚  
原祗亂稽鯨掀才足膾狸搢可須埋王略過銅柱天威  
暢藁街斗牛光更潤溟海靜無涯賈舶盈珠琲宮娥賤  
玳釵拜侯金篆斗犒士酒如淮神武千齡協歡娛萬國  
諧告成方歷吉名嶽望裡柴

溫湯和王法曹

火井傳夷檄炎洲記海隅仙遊空詣絕方志每多誣汎  
濫浮清沼淵源自奧區洪鈞從鼓橐一氣審為爐烈焰

方楚澤騰波盛濺珠沃焦難與並執熱諒誰須鼇抃終  
當釣鯨掀會學屠此中勝鬲甌不復待樵蘇池館他年  
貴衣冠萬乘俱廢興仍在目惆悵指平蕪

蔡州城枕汝水寒日水涸清淺可愛原父與郡守  
汎舟川上甚有佳境以書垂報緬想勝遊因形短  
什

積水寒收潦深淵淨見沙冷光憐玉潔清鑒絕毫差鷗  
鳥居相樂漁樵近有家濟川新剡木載石去乘槎樹影

魚鱗密城陰瓠子斜黃緣忘向背頃刻變烟霞練白翻  
雲葉金鎔蕩日華照心同不隱淪慮愛無邪客醉風吹  
酒歸迷斗轉車林宗昔無暇范蠡去空賒鳬鴈晴餘喜  
波瀾雪後佳謝塘芳草夢依約向無涯

登東山小魯

惟昔宣尼氏登山俯大東隘然輕魯國不復夢周公洙  
泗秋毫外龜蒙聚米中浮埃殊擾擾鬪蟻竟匆匆遊觀  
情應類臨河事不同豈將千乘富一換舞雩風

賀王汝殿中御史

世許忠臣子仍為憲府官  
自宜棠棣萼復正觸邪冠  
霜肅臺中柏香餘省署蘭  
鷹鷂與秋勁冰玉瑩心寒  
去路鄰霄漢無人怨鏤千  
流傳廟廊語聳激壯夫肝

佚老堂為馬給事題

膂力期方壯功名付衆才  
朝廷不能出軒冕儻時來  
賢者皆知此勞生亦念哉  
暮年均暇逸末路忍低回  
延閣通雲漢東垣接上台  
老成宜鶴髮絕足信龍媒  
脫落經



綸際從容里地開圖書收舊素池藥就穿栽松竹依陶  
令兒童戲老萊尚知南郡富肯使少游哀詎有東家問  
端思齒杖陪會為三徑客幽屏謝塵埃

灞渚望長安

去國一回首憑高因肆觀清川會灞渚白日麗長安魏  
闕中天直南山並海寒樓居雲縹緲城象斗闌干即事  
感能賦有情知永嘆不勞歌倚瑟悽愴指邯鄲

集英殿觀先帝御容

墮淚不能禁，彤庭北望深。  
壽觴疑在眼，宮漏獨驚心。  
繪事應神助，天光想下臨。  
秋毫分萬一，玉色辨侵尋。  
未悟攀髯遠，如聞棄屣音。  
當時萬年木，風動亦蕭森。

王四十監鴻慶宮

沛邑祠原廟，明年啟壽宮。  
真遊追柱史，吏隱即冥鴻。  
苑路連修竹，兒歌習大風。  
海鳬隨步武，笙鶴下虛空。  
司馬官園令，千秋擢寢中。  
書成大人賦，夢識白頭翁。  
北闕縻徐樂，丹砂愧葛洪。  
帝鄉那可問，相望五雲東。

代魏秀才和

明府敏為政經綸功已深無欺禮神意不擾愛民心直  
道容多梗良時避孔壬未成宣室召空賜潁川金茲日  
量天聽方春報雨霖望蛭舒黯黯笑電趣泔泔耒耜謹  
南畝歌謠變越吟和應光蕪戶潤足俟薰琴久客羞王  
祭忘饑學漢陰鹿門那忍去留釣此江潯

又和魏秀才

川原惟漢廣雷雨向春深望望三農事悠悠一歲心月

離初候畢龍見亦推壬向夕風翻海中天電爍金農占  
不騎晦史例足書霖至治無饑穰元和茂旱涫遷鸛殊  
自喜倦客獨悲吟未必魚生釜聊因酒貰琴奮身從嫖  
姚走馬過雕陰辜負封侯骨棲遲沔水潯

答吳侍郎寄陝府

天王相有三分陝按轂函列國依明德西人盛美談甘  
棠元聽訟綵服自調甘餘力斯文貴珍詞萬象含氣清  
融渤澥材絕聳梗枻請誦詩三百先知學召南

次韻和韓持國雪二十韻

層雲升蒼莽密雪亂高低巧緻欺工倖繁多感計倪因  
高宜嶽鎮善下及塗泥海變方朝若天通憶命黎懸簷  
垂齟齬投隙置刀圭冥項豪無賴娥舒弱易迷清心還  
自照正色故思齊報曙端成誤驚春妄問奚林珍翔鷺  
鵠玉氣墮虹蜺獵野甘燔兔登川快臞癯風回飄柳絮  
日暝亂醯雞蟲篆初難辨庖羔久未刲冥鴻愁徑度饑  
雀愴單棲律驗知陽復天旋測氣躋浮生共羈旅外境

本筌蹄置酒容高會論文慰解攜詩從載塗唱賦為騁  
妍題數聽波濤辨滔滔百仞溪

詠雪

朔雪三冬暮同雲萬里間昊天還質素長路失幽艱舞  
急低仍舉吹多去復還增高元稍稍投隙故閒閒積鹵  
輸鹽浦飄沙聚玉關怒濤狂振海疊嶽坐移山喜厚猶  
多積憎繁詎得刪旗旛高卷野塵堦密通闌點綴林芳  
亂裝褫石蘚斑戶斜遺尺劒窓缺置連環圭璧衣裳會

閭閻米粟頒折筮終不屈喬樹頓堪攀紈潔裁歌扇玳  
明聳髻鬟運籌思巧厯語異叱神姦凍筆無由捉強弓  
不易彎鴈號隨雀督龍蟄並魚鰥坎辟威權厲陽芽勢  
力孱晦冥愁運促溫燠愴時慳畛域通三壤塗泥洎百  
蠻瞑難矜喔喔宵犬事獾獾踈足傷騏驥迷羣失鷺鷥  
製書思摘頡議巧謝倕般蚊翼騰空曲芝英擢野菅藩  
籬容月魄軒陞絕人寰感物徒酸鼻明心肯汗顏露肌  
寒得胗直指凍成席簷罅風號勁爐灰火逗殷獵狂懷

塞漠漁樂記江灣飲乏枯瓢棄磨稀古鐵頑莫欺東郭  
履不愧半通綸

賀幸開寶寺福聖院新閣

帝圖天不極覺苑日融輝減

原註音陷

劫寧無待直乘必應

機化城非撲斲檀施自依歸香象開馳道珠璣接尚衣  
梵音潮海會阿閣鳳凰飛清蹕通長樂齋居護卻非雨

花交霰雪燎桂雜煙霏默冀南山壽賢公已見幾

原註易云

幾者言  
之先見



原父舍人爰自春坊遷職史氏未更晦望旋有新  
命增秩諫省躋榮綸閣斐然成篇以伸歡賀

近署銅龍貴仙山策府遙由來稱國士自致必雲霄太  
史題凡例彤庭奉日朝除書新翰墨受賜接晨朝池水  
通翔鳳星垣直建杓汎槎輕濟海逸御捷凌飈獻納當  
宸宸絲綸聳具寮直詞明黼黻大冊聚瓊瑤拜舞腰金  
重歸來廐馬調泥書開鵠板法駕從雞翹高興吟紅藥  
珍辭賦洞簫宮花香永晝禁漏靜通宵枝鵲聲何喜原

鵲意自饒寄言江漢客無事老漁樵

和秘閣趙光祿學士臘月夜閣宿見寄

秘宇聳嚴凝名卿壽作朋臘殘琪樹雪夜寂瑣窓燈交  
意嘗投漆高談亟引繩正憐湖海別况復歲華增詩勇  
堅無敵材全問不能龍淵方出匣持以喻韓稜


分題河決東郡

漢郡金堤北黃河落日東波濤凝沴氣翻浪蹙長空鉅  
野蛟入室魚山水伯宮坐嗟山海變心恐地天通未就

宣防築深懷夏禹功何當開嶺首西注出湖中

陪馬守蜀山禱雨

丘禱亦以久齋居先筮從鳴騶趁殘夜觸石會前峰  
蕭鼓終椒奠風霆起蜃龍化工輕瞬息幽貺振春容  
灑濯埃塵絕虛涼灝氣逢小人思學校即事喜年豐



彭城集卷十六